

Malruaus tar las ovras electricas pervi d'ina sentenza

La politica è londervi da tschertgar soluziuns – forse gist era per il tschains d'aua

CUN MARTIN SCHMID HA DISCURRÌ
CLAUDIA CADRUVI / ANR

■ **Ina decisiun da Losanna metta en perfetg las ovras electricas. Cunzunt quellas che na distribueschan betg mo energia, mabain che produceschan sezzas anc forza d'aua. Sche questas ovras ston calcular il pretsch d'energia sco quai che Losanna pretendia perdan ellas ils clients gronds.**

La chombra pitschna ha reagì immediat e stritgà en la sessiun d'enviern la disposiziun contestada. Cusseglier dals chantuns *Martin Schmid* (pld/GR) sesa en la cumissiun d'energia e spera ch'ins smineschia sin quella moda gist er il squitsch politic sin il tschains d'aua. Proximamain tracta il cussegl naziunal la fatschenta. La cumissiun discutescha in obligatori: Las chasadas duain stuar retrair la forza idraulica pli chara.

La decisiun da Losanna da l'onn passà ha procurà per gnervusadad. Pertge?

Martin Schmid: La decisiun è vegnida nunspegtadamain. La dretgira administrativa federala aveva anc protegì la pratica da las ovras electricas. Quella va uschia: Las ovras electricas che produceschan sezzas energia, per exempel cun in'ovra idraulica, furneschan a las chasadas il current ord la forza d'aua.

Maron: «Encunter la sauna raschun»

Entras la decisiun da Losanna daventa la produczion d'energia idraulica nunrentabla, di *Martin Maron*, president da l'Associazion dad interpresas da provediment d'electricità grischunas (VBE). La decisiun è gravanta e problematica, va encunter la sauna raschun e metta a frusta las ovras electricas che produceschan sezzas energia idraulica. Il tribunal federal haja prendì questa decisiun pervi da singulas ovras che hajan surfatg. Ma la gronda part da las ovras hajan ina bu-

na relaziun cun ils clients e las chasadas a las qualas ellas hajan adina furnì current per in pretsch fair. Il president spera uss che la politica chattia ina soluziun.

Per hotels e pendicularas cumpran las ovras dentant energia favuraivla ch'ellas vendan a quests clients gronds. Il tribunal federal ha uss ditg che quai na gaja betg. Las ovras electricas stoppian applitgar l'uschenumnada «Durchschnittspreis-Methode». Quai vul dir: dauzar il pretsch per ils clients gronds, malgrà che las ovras cumpran aposta mo per els il current bunmartgà, e sbassar il pretsch per las chasadas. Quai fa donn a tuttas ovras electricas. Ellas han in dischavantatg visavi ils furniturs che cumpran l'energia mo sin il martgà liber.

Tge consequenzas ha la sentenza?

Ovras electricas cun in'atgna produczion na pon betg pli furnir energia a clients gronds damai che la forza d'aua è mumentan deplorablmain bler pli chara ch'il current nuclear u da charvun. Sche las ovras ston desister da cumprar energia favuraivla sin la fiera libra perdan ellas ils clients gronds. Questa sentenza va encunter ils interess da la forza d'aua. Ina tala soluziun na pudain nus betg sustegnair.

Tgi è pertutgà en il Grischun?

Pertutgadas èn tuttas ovras electricas che furneschan energia a clients gronds e che possedan in'atgna produczion.

Mitschar pon mo quellas ovras che han aposta fundà in'interpresa per dischlocar il problem, pia ina societad giuridica che cumpra energia favuraivla e fa la fatschenta cun clients gronds.

Vus essas en il cussegl d'administraziun da Repower. Ha Vossa interpresa era ina tala societad?

La Repower n'ha betg fundà ina tala societad. Sin fundament da la decisiun da la dretgira administrativa avain nus pensà che nossa pratica saja valaivla. Sch'ins legia la lescha n'è la sentenza da Losanna betg chapaivla. Ella na correspunda betg a la voluntad dal legislatur. Il parlament n'ha mai vulì disfavisar las ovras che produceschan forza d'aua.

Vus sesis en la cumissiun d'energia dal cussegl dals chantuns che ha reagì immediat sin la sentenza.

Nus essan vegnids elegids per schliar problems. Sch'il tribunal federal prenda decisiuns encunter l'interess da la forza d'aua stuaun nus vegnir activs. La «Durchschnittspreis-Methode» n'è betg en l'interess da la forza idraulica. Il cussegl dals chantuns ha instradà en la sessiun d'enviern ina midada da lescha. En sasez lain nus simplamain cuntanscher la pratica che la dretgira administrativa aveva gea confermà. Questa pratica duai valair fin che la strategia d'energia va en vigur.

Ma la strategia d'energia n'ha betg in connex direct cun la sentenza.

La strategia d'energia preveda ina promozion da grondas ovras idraulicas: Las ovras electricas duain survegnir ina premia sch'ellas vendan il current d'aua en la fiera libra. Sch'il pievel accepta la strategia d'energia avain nus pia ina soluziun che mitigiescha il problem.

Pertge ha il cussegl dals chantuns anc scrit ina clausla retroactiva en la lescha?

Sia cumissiun ha immediat reagì e proponì correcturas per che las ovras dastgian calcular vivanant tenor la pratica usitada – cusseglier dals chantuns Martin Schmid.

FOTO O. ITEM



Quella di che tut ils cas nua che la dretgira n'ha anc betg decidì vegnan tractads tenor la nova lescha.

Teman ins pia che las chasadas pretendian enavos la summa ch'ellas han pajà da memia?

Igl è in pau sco tar las cassas da mal-sauns che han fatg pajar memia autas premias. Il singul assicurà na survegn era betg enavos ils daners. Las ovras idraulicas ston bunifitgar l'import memia aut ensemen cun las tariffas futuras.

Il cussegl naziunal tracta sco proxim las midadas che la chombra pitschna ha instradà. Dessi puncts ch'ins pudess anc meglierar?

La cumissiun dal cussegl naziunal ha prendì si nossas propostas e reconuscha ch'ins sto agir. Ella less dentant anc metter en la lescha in obligatori da retrair forza d'aua per las chasadas. En rama da la strategia d'energia avevan *Stefan Engler* ed jau gia fatg talas propostas cun in model da quotas, ma senza success. Uss vai exact en questa direcziun. La cumissiun dal cussegl naziunal va forse anc in zichel pli lunsch. En min-

tga cas èsi la dretga via: rinforzar la forza idraulica svizra.

N'èsi betg malgist sch'ins sforza las chasadas da cumprar il current pli char?

Impurtant è da vesair l'entir context, gist era cun la problematica dals tschains d'aua ch'ins sto proximamain schliar. Nossas stentas han la finamira da vegnir cun in nov model che prenda davent il squitsch sin ils tschains d'aua. Sche nus chattain uss ina soluziun ch'ins po furnir la forza idraulica a las chasadas, lura sminescha quai sument il squitsch sin il tschains d'aua. Sche quai na reussescha betg avain nus starmet ch'il squitsch politic sin il tschains d'aua daventa memia massiv.

Ins vul pia adossar ils custs dals tschains d'aua mo a las chasadas?

Gliez è gea gia oz uschia. Tgi che retrira oz current idraulic paja il tschains. La finamira è da sbassar il squitsch politic areguard ils tschains d'aua. Quest squitsch tschessa sche nus chattain ina soluziun che oblighescha las chasadas da retrair il current ord la forza d'aua.

Sentenzia 2C_681/2015 e 2C_682/2015